

# *MUXINTTA MUULUPALE*

## *NI OOWERYA*

♪ Mooxeleliwa, wa nyuwo. "Paasikha oohakalaliha murima" saana wa khula mmosa a nyuwo! Nla ti nimosa wa mahiku maalupalex, wo otthapela ohihimuwa wa Pwiy'ahu. Ti nimosa wa mahiku maalupalex a wahala a olumwenku wothene. Ti ohihimuwa. Nto hiyo ninnitteeliwa murima okhala va, voosiis'ula, nihiku nla nuulupale. Ni woona nsuwa niphattuwaka, ni ithutu siphuwaka elapo ya vathi, sothene sinlavula sa Paasikha.

Nto vano nrowe nuuramihe muru ahu okathi vakhani paahi.

<sup>2</sup> Muluku Tithi, Ohoolo Wanyu hiyo ninnoorwa. Ni ninniwehererya Nyuwo onivaha, voosiis'ula, eparakha vakhani paahi yowaacereriwa ya Wirimu, okwannya vakhani wa Paasikha mmunepani mwahu yoohi; wira, nakhuma va, niwerye ohimya, ntoko ale yaakhuma Emawusi, "Khinoona mirima sahu oniviha mwa hiyo, mwaha wa Mukhalelo Awe?" Vano, hiyo ninvekela mwa Nsina Nawe, ni wa ovuwa Wawe. Amen.

<sup>3</sup> Muliivuruni yookiserya, kapiitulu 28 ya Ehapari yooreera ya Matewu Oowaarya, ni versiikulu 7, kaatthuna kisome ntoko yoosoma, okathi onkel'ahu mmutekoni mu.

*Vano murowe mwaakuvaka, mwaaleele awiixutti  
awe wira owo oohihimuwa mw'alipa-ookhwa; vano,  
nto, onoohoola orowa oKalileya; weiwo nyuwo  
munoomoona: moone, miyo kaahooleelani.*

<sup>4</sup> Onnikhalaka orummwa wunci-ene wuulupale onvahiwaka mutthu ni atthu a mulaponi mu. Masi khonakhaleke orummwa wuulupale woovahiwka ntoko ola, "Murowe mwaahimeerye awiixutti Awe wira Owo oohihimuwa mw'alipa-ookhwa." Iwo ti orummwa wuulupale. Nto enamuna emosa paahi ela yaakkhanlyayaaya ovahiwaka, waari okhala wira waahaana okhala oxintta wuulupale toko.

<sup>5</sup> Annikhala atthu mahiku ahu, ni mahiku avinre, ni mwa wahala muulupale a olumwenku ula, mmapuwani mwaya maalupale, ni ootaphuwa a ekhotto; annikhala alipa-ooxintta anci-ene ni aalupale, itthu sinci-ene suulupale siniireliwaka nloko n'atthu.

<sup>6</sup> Mwa nlikanyiho, miyo kinimuupuwela, okathi waarwaaka voosiis'ula, kivenyaka oxaka, ni nkaarina okathi wo osoma vanci-ene. Okhala wira, miyo nkaasuwela epantte xeeni, nsana ohiyu, hiyo naarowaahu okhalana olelo, eriyari ya

pastore ni miyo, mookokhorelani. Masi mphironi kirwaaka, khwiiraneya wira kaahuupuwela ethu, voosiis'ula, yaarowa okhala yooreerelaxa kinsuwel'aka wira kaahimeerye atthu Awe, wira kikuxe ntoko mutthaka. Miyo khuupuwela ela, "Murowe mwaahimeerye awiixutti Awe." Vano, *awiixutti* Awe ti "anammuthara" Awe. *Mwiixutti* ti "ole onthara." Vano miyo kuupuwela mwaha ola, wa, *Muxintta Muulupale Ni Oowerya*.

<sup>7</sup> Ni kiwuupuwelaka amuxintta akavi nitonko ahu okhalana molumwenkuni mu, ni itthu suulupale awo siiralyaaya wira ekelelihe oholo ni ekhalihe yooreera enamuna yo okhala w'atthu. Miyo kaamuupuwela Napoleawu muulupale, wu mwa mahiku awe, wira owo vekeekhai khaari muFransa, masi aahikhala awwa mmuruni mwawe. Yoopacerya, owo—owo aanimuthanya Fransa, owo khaasiveliwa ni yoowo. Owo aakhumme okisironi. Masi owo aahikhala muupuwelo mmuruni mwawe, wira, nihiku nimosa aamurowa oxintta. Ni ethu owo aakhalanenle-awe yeeyo mmuruni mwawe, okhala wira owo aahaana okhalana ethu y'ovara-vo muteko.

<sup>8</sup> Wa khula, mutthu muhinathhi ovara muteko, muhaana okhalana niwoko nimosa, eyaakakhanyeryo, etthu envarelaanyu-vo muteko, ntoko ethnunelo wira nvare muteko, etthu wira nvare-no muteko.

<sup>9</sup> Nto ntoko hiyo othene sinsuwelaahu, naamukuxaka wahala a Hitler...wala, kahi a Hitler, masi a—a Napoleawu, wira owo aaiseettiha ni mweeri, ni orukunuwa wa ittheneeri. Owo aavaraka muteko siiso, ni owehereryaka; okhala wira emaara emosa owo aahiira siiso, khuphwanya oxintta. Vano owo khuthaamela oFransa, khukhala nakhotto muulupale. Owo aahiruma wiiviwa atthu anci-ene, okhala wira awo khayiiraana ni owo. Ni aahuukuttha elapo awe yothene, khula etthu yaanvirikanya yoowo. Owo vekeekhai aahaamalamaliha voomalela, okhala wira yaahaana okhala siiso. Yahaakhanle siiso, yaamukhala etthu ya nthowa wa yoowo okathi wothene, ni ethokiheryo awe yuulupale owo aarin'awe mmuupuweloni mwawe. Ekumi awe ene yaamoopopihwa, tivo owo aahaana okhalana omwene awe wothene woolikana voomalela ntoko saawery'awe.

<sup>10</sup> Miyo kinimuupuwela vano wira nyuwo munnikithara mwa yeela, wa *Muxintta muulupale* miyo onimuupuwelaaka. Itthu sothene Momweneni mw'Awe sihaana okhala soomweemererya Yoowo. Ohaana okhala murima, munepa, ni erutthu, simweemereryaka Yoowo. Ehkhaleke hat'etthu ya nthowa eninvirikanya Yoowo. Etthu p'itthu yaarowa onvirikanya Owo, Owo aahana okumiha. Owo ohaana okhalana sothene voomalela simweemereryaka Yoowo. Nto okathi...

<sup>11</sup> Napoleawu, owo aahikuxa misika, ikanyawu, ikapwithi, imosikeete, axoowa. Ni aahirowa ni muupuwelo mmosa

yoola, wira aamurowa oxintta olumwenku. Nto owo voowerya owo aahiira, ni miyaakha miloko miraru ni miraru. Okathi waary'awe mmiravo, owo aari namakaaliha. Ni osuweliwa wawe wuulupale waahimukhalihia oowiihelana; vano eyo yaahimphiya mmutikani mwawwe, mpakha owo okhwa ni miyaakha miloko miraru ni miraru, namuhapaliwa. Owo khaawenrye olipiherya osuweliwa wawe. Ni kinimuupuwela mutthu mmosa, mwa yeela, ni miyaakha miloko miraru ni miraru, aaxinttale olumwenku nave khukhwa oryeene namuhapaliwa, mwaha wo osuweliwa wawe, ni khupwetexa mwaha waawanelawa. Owo aari e—owo aari enamuna ya muxovo, wala, kahi muxovo, kaamwiira, masi owo aari ekaruma ya xetwani. Ni eereryaka opwexakasa olumwenku, owo aahivonya, ni miyaakha miloko miraru ni miraru.

<sup>12</sup> Masi, oh, Nakhotto ola muulupale, oowerya onimuhimy'aka, ni miyaakha miloko miraru ni miraru, ooxintta itthu sothene saari mulaponi ni o—omooroni. Ni miyaakha miloko miraru ni miraru, Muxintta muulupale ni oowerya!

<sup>13</sup> Kinuupuwela ikhottto suulupale sitonko owaniwa vapuwani. Hiyo noosuwela, wira nimalihe ni Napoleawu, wira owo aaphin'ye woomalelani wawe oWaterloo. Ni kaahikhala muraarelo, woohikhala khalayi, woono, wo woona itakiheryo saapakiwe sa milepe sa ikaaro sawe, ni sa anakhavaloo a mulopwan'ovo, sa moota awo yaamoranse-aya vapuwani va ekhottto. Ni ikaaro sookutteliwa vamosa, maroota oohononeya, nno ni nno mmapuroni oowaataleleya, a nipuro mooniheryo ola muulupale waairiwaaya-vo.

<sup>14</sup> Nto nvirikanyo xeeni: onweha mulopwan'ovo ni miyaakha miloko miraru ni miraru, ni ehaaya enooniheriwa iwe omuupuxeroni wa ekhottto awe yuulupale ni oxintta; vano nto orowa oYerusalem, ni oweha mahiye oohikhala'etthu, ntoko muupuxeryo wa Muxintta muulupale ni oowerya.

<sup>15</sup> Mwa enamuna emosa wala ekina, yookhala etthu muhina mwa oxintta. Nakhalana-ru etthu enwanelahu, yakhala-ru eretta mw'erutthuni mwahu, nto hiyo ninawana eriyari ya okhwa ni ekumi, owerya xeeni onkhala okathi onoon'ahu wira yooxinttiwa. Naawanaka mwaha wa muhapo mmosa muulupale, wala etthu emosa yuulupale ennirukurerya, vookiserya okathi ipantera suulupale sinveveleyaaya ni hiyo nooxintta; moonelo xeeni ennivahaaya, muhina mwa hiyo, maana ninoowerya nto okhala muxintta.

<sup>16</sup> Vano kinuupuwela ekhottto yookiserya, ni moota okathi Hitler aakunxaawe muttetthe w'oVarsooviya. Nto atthu a wAlemaanya yoona wira ele yaari emosa wa ixinttelo suulupale saakhanle okhalaka, okhala wira mukhulupale aya oomalela, Adolf Hitler, aahipwiniha vamosaru itthu sothene oVarsooviya, opwexakasa mithato, ni muthato muulupale khumora. Ipaphelo

sa ihapari saahikumiherya ilatarato suulupale sa emorelo ya muthato. Atthu a wAlemaanya yaaheetta mphironi, yaahoopa ikoma ni woopa mituri, ni matteeke ikonto sene yaahivira vakhiviru va yoowo, okathi waaphwannyaawe oxintta wawe wuulupale woopacerya. Aisoonihaka ntoko Alexantere Muulupale, wala Napoleawu, wira axintte olumwenku, masi owo aamalenle vayi? Otakhaliwa. Vekeekhai, ti siiso.

<sup>17</sup> Kinniwerya wuupuwela okathi aatekiwaawe Rampha muulupale a oPirmaaniya. Yaahaana okhala...vakhala wira awo avirinhe vasulu va mwaako. Amosa-amosa wa aximiravo akilaanthe vaava voosiis'ula, khino, amulapunwe rampha ola muulupale. Muteko xeeni waari uwo! Muteko mukavi owo aavanhe-awe, ni muteko xeeni w'ekekhai awo avaranse-aya! Ni musurukhu kavi otthuneiye wira otekiwe Rampha ole a oPirmaaniya, itoolare imilyawu! Amiravo yaapweteiye ekumi aya, mwaha wo wira siiso! Masi vookiserya, ni nuuvira okathi vakhani, okathi emiilya yookiserya ya rampha yaaviralyaaya, ni okathi rampha omalelihiwaawe, atthu yaanikhuwela mwaha wo oxintta! Awo yaahikhalana rampha yaakhanlyaaya oviraka mmiyaakoni, wira ephwanye oxintta.

<sup>18</sup> Kinimuupuwela rampha mukina, nihiku nimosa yaathhuneiye-aya ekumi ya Pwiy'ahu oottottopeliwa. Khiyaari ephiro emosa paahi mulaponi, masi ephiro yuulupale eniihaniwa "ephiro yuulupale ya ereerelo murima," yeeyo ole ootakhala ohinrowaawe ovira, masi ale paahi athittiwe. Ale paahi ari epantte Owo oryaawe-wo, anoovira ephiro ela yuulupale.

<sup>19</sup> Ixinttelo suulupale soophwanyiwa. Anci-ene a hiyo olelo anoowerya wuupuwela oratta-ene Ekhotto Yoopacerya ya Mulaponi mothene. Miyo kinniuupuwela okathi waary'aka mwammiravo paahi, kinniwerya wiiwa ipiito sirumaka; ni hata alimi, omatta, yaaheemexa ikhavaloo saya, ni ottikinya ixapheyo saya. Awo yaahikhwela. Awo yaahinyakula. Exeeni yaakhumelen? Ekhotto yaaroomala. Oxintta waahiphwanyiwa. Ekhalanelo yuulupale naawanelaaahu, vookiserya naahiphwany oxintta.

<sup>20</sup> Kinniuupuwela ekhotto ela yookiserya ya mulaponi. Miyo kaakhala epantte ekina y'ephiro. Nto okathi ipiitu sipacenryaaya oruma, atthu ethyawela mukintaali; athiyana ni inventaali saya, erulaka, ni eveveleihaka osulu. Ipholovolo saanivava siviraka mmirini. Ipiitu saaniruma. Ikaaro saanithimaka mphironi. Atthu yaahikokhora, ni ovenxa matata aya. Awo yaahikhwela. Awo yaaninla. Mwaha wa xeeni? Okhala wira ekhotto yaahimala. Nto ale ooreerihiwa, amiravo oophentiwa yaari epantte ekina y'ephareya, voohilekela yaamutthikela-tho owaani wa yaawo. Oxintta xeeni! Okathi xeeni, ni ohakalala wa khula murima! Yopeeli xeeni! Ohiy'ule, atthu othene yaari ni ekhalelo yooreera, mwaakhanlyaanyu ovolowaka murestaurante n'ulya, ni okhuma muhilinve,

khuwaakhala mulattu. Mwaamuwerya nyuwo orumeela ekaaro ya mutthu mukina, khuwaakhala mulattu. Vamuuweryaneya nyuwo oveka ethu mwaarowaanyu otthuna, nto khino mwaamwaakhela. Mwaha wa xeeni? Oxintta waahiphwanyiwa. Amiravo yaatthikela owaani. Sothene saahimala.

<sup>21</sup> Nto miyo kinimuupuwela, munn'aka, ti yoowooniha othunku enamuna eyo ya moonelo ohiweryaka okhala okathi wothene. Masi, wa muKristu, voosis'ula, oxintta woophwanyiwa. Ittiwi sa ohakalala sinooruma. Ekhotto yoomala, eriyari ya Muluku ni mutthu. Oxintta woophwanyiwa.

<sup>22</sup> Khula oxinta ohinatthi ophwanyiwa, sihaana okhala ihisapo suulupale sinlinvwa. Oh, ihisapo xeeni! Ni imaara sikina ti soowiixerya saana, ni sinnikumiha mirahu suulupale, sivilalihaka. Masi, wira nikhalane mwaako, nihaana okhalana ekhato. Nihinatthi owerya okhalana waarya wa nsuwa, nihaana okhalana epula. Nihinatthi okhalana waarya, nihaana okhalana ohiyu. Nihinatthi okhalana yooloka, awo yaahaana okhalana evonyeryo, ahiiso khamunrowa okhalakhala musuwelaka ele ekhanle yoovonyeya.

<sup>23</sup> Masi wira oxintte ni owerye ekhotto yuulupalex etonko oxinttiwa, Mmosa aahikhuma Movuwani, miyaakha sinciene sivinre. Ni Owo khaakunxe mwa Yoowo mukhalelo wa Nlaikha. Owo khaarwiye ntoko mutthu mmosa muulupale. Masi Owo aarowa wooniherya wira khasintthuneya mosikeete ni ipholovolo, ni ikapwithi s'atomu, wira exinttiwe ekhotto. Owo aaiwanrinhe wiiyeviha, ntoko mwanamwane, ni aayariwe mwaalyela inama. Khinaakhanle hata nipuro na oyariwa Wawe, okathi Owo oruuly'awe. Kintthuna wira nwehe ikaruma soohiyana-hiyana sa ekhotto, seiyo Owo aarumeenlyaawe.

<sup>24</sup> Vano, nloko na Atamu naari nothene mw'epotthani. Awo yaari iwe, voohiroromela, oohikhala Muluku, oohikhala mureerelo, voohimoreliwa ikhari, hat'etthu yaakhanle waakhaliheryaka. Awanani aalupale, a mapuro a vathi a ale oopweteyea, yaahaatthukwela mw'epiphini. Khiyaakhanle ekhumelo. Khaakhanle hata mmosa aakhanle okhaliheryaka. Khiivo yaakhanle wiiriwaka. Yaakhala ntoko epweteyelo yoolikana, yoomalela.

<sup>25</sup> Masi Mulipa-oowiivaha ahu, Yoowo okhurunwe okhuma mikhora sa Movuwani, aiyevihaka!

<sup>26</sup> Maana, khaakhanle hata mutthu elapo ya vathi aawerya ovara mutek'owo. Awo othene yaari, ntoko olavula wa molumwenkuni, mwaatiya mmosaru. Hiyo, othene, "niyariwe mutampini, nipakiwe mwa sootakhala, nirwiye mulaponi noothaka." Ni khaavo hata mmosa wa hiyo aawerya okhaliheryana mmosa ni mukhwaawe. Hiyo naari oonyanyaliwa, ooxinttiwa, evitikavitika mapuro othene, othene oohiiwanana. Khinaawerya osuka ikano ni meera, niphwanyaka otteettheya

waya ni siiso, khinaawerya wira. Ni yaakhala ntoko nloko nothene n'atthu naahikakhanyuliwa.

<sup>27</sup> Vano nto Owo khurwa, Owo khikhuruwa. Okhala wira, “Owo aari wopaceryani,” Bibilia ohimmye wira, “Owo aari Masu.” Owo aari Logos yaakhumme wa Muluku. Ni Logos, wopaceryani, yaari Masu. Nto Owo khukhala Masu. Nto okathi Owo owenly’awe nihiku nle noovuwa na Paasikha, Owo khaakhanle Masu paahi, masi Owo ookhala Namukuttho Muulupale a Masu Awe Mwaneene. Oh, ethu xeeni yoovuwexa, Munna Neville! Muupuwele paahi! Owo kahi Masu paahi, masi Owo ti Namukuttho Muulupale a Masu Awe Mwaneene. Naakhanle ohoveryaka sayi? Naakhanle ophiyaka sayi wa Yoowo ni ohaamini wira ninimwaakhela ele envekel’ahu? Maana, Owo ti Masu ni Mulipa-oolapela a Masu! Logos yaaikhalihe Masu, nto Masu khwiipaka eruthu; ni eruthu yeeyo yaari Masu, khwaakheliwa Movuwani, nto vano ti Namukuttho Muulupale onlapela, mwa Yoowo, wa Masu Awe.

<sup>28</sup> Ti yeeyo entthuneya! Eyo ti ekaruma Ekereja erinaaya. Kapwithi xeeni! Khonakhaleke hata mmosa ntoko Yoowo. Owo aari Masu. Nto okathi Owo orwiyyaawe, Owo aayariwe mwaalyela inama. Owo aarwenle omurumeela kapwithi o-p-h-e-n-t-a, ophenta, wira oxintte olumwenku; kahi ni ipholovolo s'anakhotto, kahi ni ikapwitthi sa ipholovolo ni itanki. Masi Owo aarwiyye mwa enamuna yoovirikana. Owo aarwiyye mwa enamuna ya ophenta. Owo aari ophenta wa Muluku.

<sup>29</sup> Emaara emosa, ntoko mwammiravo, kuupuwelaka wira Kristu aanikiphenta, nto Muluku aanikinyokha; okhala wira Kristu ookikhwela, masi Muluku aahikhalana ethu ya nthowa ni miyo. Masi kiphiyerya osuwela wira Kristu ti murima ene wa Muluku. “Muluku oophentexa olumwenku, mpakha Owo onvaha Mwan’Awe mmose-ene, wira othene ole oni omwaamini Yoowo ohipweteye, masi okhalane Ekumi Ehinalima.”

<sup>30</sup> Vano Owo aarwenle, toko, wira axintte. Nto ethu xetwani aahenlyaaawe molumwenkuni waari onyokhana. Ni Owo aarwenle oxintta onyokhana. Hiyo naaxinttaka ikhotto sahu, ni sikina, mukhottoni sa molumwenkuni, kweekwe sinnihiya, voohihiyererya, onyokha; okhala wira, ikhotto sa muthinto owo ti sa nwanani. Masi Kristu aarwiyye n’uphenta, wira axintte onyokha, wira aaphente ale yaahaaphwanelo ophentiwa. Owo aarwiyye ni kapwitthi oovirikana. Ni Owo aahiiyeviha, “aahikhalihia oyeva vakhani ovikana Malaikha,” wira ohaawe okhwa, ni ovaha ethoonyeryo. Ni okathi Owo aary’awe muumu elapo ya vathi, Owo aaheetta eriyari y’atthu.

<sup>31</sup> Owo aahiooniherya akapwitthi Awe a ekhotto, okathi Owo aavoninh’awe aretta. Okathi okunx’awe mikatthe mithanu ni ikapatti piili sa ihopa, khwaalyiha atthu ikonto thanu, Owo aahooniherya wira aahikhalana owerya vasulu va khula

kapwitthi a atomu aakhane. Kahi wira Owo aannuwinhe ehopa paahi, masi Owo aannuwinhe ehopa yoowaapeiwa. Kahi wira Owo aannuwinhe etriku mmikattheni mmwe, masi Owo aannuwinhe etriku yoowaapeiwa mmikattheni mmwe. Eyo yaahooniherya wira Owo aari Muxintta ole muulupale ni oowerya! Kahi wira Owo aakunxe maasi veehimeni, masi Owo aahitatuxa maasi ale, eviinyu, a veehimeni. Owo aahooniherya wira aahikhala Owerya wo oxinta. Ni Owo aaniphenta, ni kapwitthi Awe waari ophenta. Vano nwehe.

<sup>32</sup> Vano Owo vairaly'awe siiso, okathi Owo aary'awe nihiku nimosa vakhiviru va mahiye a Lasaro, ni aahikhala mulopwana mmosa, aakhwiye, oovithiwa mwa mahiku maxexe. Hata ale yaari vakhiviru, yiirale, "Onimunkha vano." Ephula awe yaahipwina, axiithtu a veerutthuni yaanipuruleya mwa yoowo. Nto Yesu khweemela vale, ntoko Muxintta oowerya, okathi Owo omuhimenry'awe Marta ni Maria, okathi Owo eemenly'awe vale, "Miyo nkoolleenleni wira, 'Nyuko mwaawenrye-ru waamini paahi, mwaamoona ovuwa wa Muluku?'" Owo aammalaru ohimya (okathi awo yaairalyaaya wira, "murokor'ihu ohookhwa," ni siiso), Owo khwira, "Miyo ki ohihimuwa ni Ekumi! Ole onikaamini Miyo, hata onakhwaaru, onookhala mukumi. Ni ole orina ekumi ni onikaamini Miyo, khankhwa-tho. Miyo nkimanle wooleelani wira Owerya iwe, Ohinimala, woottottopeliwa onkhala mwa Miyo?" Owo khaahimmye paahi nuulumo, Owo aahiwerya omaliherya itthu sothene Owo aahimmyaawe, okhala wira Owo aari Muxintta oowerya.

<sup>33</sup> Akhalaka mwa Yoowo, avarelelaka, owiipitha mw'erutthuni ya mutthu, ntoko mutthu, masi muhina mmwe khaakhala hata mukina woohikhala Muluku Oowerya sothene, Ole muulupale ni oowerya. Owo aaniwerya otthikela opattuxa. Owo aaniwerya opattuxa itthu isya. Owo aaniwerya olavula, ni ethu Owo aavekelaawe aanivahiwa esekuntu ene yeeyo. Masi, Owo aahiiyeviha Mmansawe, Owo aakhala vathi. Owo aatthuna ovaha ethoonyeryo. Owo aatthuna okhala muthinto woolikana wa Muxintta, ni Owo aahikhala. Vano, Owo aahiisooniherya Mmansawe wira aari yoowo.

<sup>34</sup> Ntoko sinihimyak'aka imaara sinci-ene mmithukumanoni saka, khino yaamukhalela onamoona voosis'ula, munikhuruni nla n'atthu, voosis'ula wooreera wa Paasikha. Muhanoo mmosa, oniira mpantta wa ekereja emosa ehinaamini okupali Ephome ya Pwiya Yesu. "Voohikhala omwaraxiwa wa Ephome, khunkhala oleveleliwa wa etampi." Owo aakileenle wira Mulopwan'ovo aari profeta paahi, Mutthu mmosa oothamaleya, nto Miyo kaamukhaliha oMuluku. Miyo khwira, "Owo aari oMuluku. Owo aari Muluku."

Owo khwira, "Nyuko muneererya omukhaliha muulupalex."

<sup>35</sup> Miyo khwira, “Khaavo hata moolumo yaakhanle oohimyaka eyuulupale Awe!” Nlumi na Mutthu khinnatoko ophwanya nuulumo nene!

<sup>36</sup> Kilavulaka ni mulopwana mmosa nihiku nimosa, namurummwa mmosa a oWashington, DC, nto owo khwira, onamoona mwaamukhaani wa o—olya wa voosiisu weijo naapatthanaahu vamosa, owo khwira, “Munna Branham, miyo kinnikhala muLuterano ekumi aka yothene. Masi,” owo khwira, “nihiku nimosa kiryeene vamuhakalalihoni wa enamuna ya khalayi,” khwira, “Kaahikokhora waltaari, ni kaatthuna okhalana musuwelelo ni Muluku.” Owo khwira, “Nto kiryeene vale kikokhonre-ene...” Vano, ola namurummwa a oWashington yoowo hata orumeenle mukuveerununi wa Mukhulupale Cooldge. Nto okathi owo “ovenxalyaaawe maitho,” owo khwira, “Miyo kaahoona yoowoona ya Yesu.” Owo khwira, “Kinniweriya olavula mattaava mathanu na maxexe oovirikana, vooloka-vo.” Owo khwira, “Masi nkaawerya ophwanya nuulumo nimosa n’ohimya, wa mattaava ale othene mathanu na maxexe.” Owo khwira, “Vano miyo kivenxa ntata naka paahi, nto Owo khukivaha nimosa nsya, wira kilavuleke-no.” Owo khwira, “Miyo kinoomalaru woona Nttittimilohi wa ekhove Awe.”

<sup>37</sup> Muhan’ola khukiirela, owo khwira, “Munna Branham, Yesu khaari hat’etthu woohikhala mutthu, profeta paahi.”

Miyo khwira, “Owo aari Muluku, murokor’aka.”

<sup>38</sup> Owo khwira, “Nyubo mummukhaliha oMuluku, masi Owo kahiyoo.” Vano owo khwira, “Orowaka vamahiye va Lasaro, Bibilia ohimmye wira, ‘Owo aahinla.’”

<sup>39</sup> Vekekhai, Owo aari murima ene wa Muluku. Owo ooхаawa ntoko hiyo onihaawaahuu. Owo aari erutthu ntoko hiyo siryaahu erutthu. Owo aanikuxa, mw’erutthuni mw’Awe, soothuna imosaru ni itthu ninkuxaahu. Nnya, wira okhale Mukuttho wooloka voomalela, Owo aahaana wira yeeyo. Owo aahiira. Masi miyo khwira...

Owo khwira, “Owo aahinla, arowaka vamahiye va Lasaro.”

<sup>40</sup> Miyo khwira, “Masi, oh, muhano, eyo ekekhaii. Owo aari Mutthu, okathi waanlaawe. Masi okathi Owo eemenly’awe vale, vakhiviru va mahiye ale, vaavo namukhwaa oomaala aaphwanyanyaawe-vo, vaavo erutthu yoowunnta yaaphwanyanyaaya, yookhuneeliwa esanta, okathi Owo ohimaly’awe wira, ‘Mukumihe nluku,’ Owo khookolela erutthu Awe yaamukhaani, khwira, ‘Lasaro, mukhumele ota!’ Nto mutthu aakhwiye, mahiku maxexe, khuvenya khweemela.”

<sup>41</sup> Yaari exeeni iyo? Eyuntte yaahimusuwela Mpattuxa aya. Munepa waahimusuwela Pwiya aya. Ni Muxintta ole muulupale ni oowerya aahooniherya wira Owo ookhalana Owerya wa okhwa, ni omooroni, ni mahiye.

<sup>42</sup> Tthiri, eyo ennithananiha murima ahu! Ennihimmwa omana makapu, ni orumiha nipettha? Olumwenku waahaana okhala muyopeelini voosiis'ula, ntoko ohinatoko aya okhala, okhuwela n'unyakula w'atthu Awe, okhala wira nla nihiku na muupuxeryo okathi Owo omuxinttale-awe nwanani ookiserya, khunitaphula hiyo naatthukiwe.

<sup>43</sup> Ayo, Owo aari Mutthu. Ti yeeyo. Owo aahooniherya okhala Mutthu, ni aahooniherya okhala Muluku.

<sup>44</sup> Ohiyu umosa, okathi ephareya, yuulupale yoowali, etonko omalija ikumi ikonto sene... Khino amosa-amosa wa nyuwo aximai va, voosiis'ula, an'inyu ahookhwa ophareya iwe yoowali, siiso apwinne-ene vathi va mawimpi mmapuwani maalupale a ekhotto. Akina wa oophentiwa anyu amphwanyaneyea iwe, khino vathi va ephareya.

<sup>45</sup> Masi ohiyu umosa okathi Owo waary'awe mmwaatiyani mwaamukhaani, ni mawimpi yaaniveveleya mphareya, ntoko erooya ya esuupha, Owo khuvenya, khuhela nnawu Nawe vasulu va mwaatiya, Owo khuweha osulu Wirimu, khwira, "Mmaale." Nto mawimpi, Owo khwiirela, "Mwiikhale!" Nto ephareya ele ya ikuru khukhurunuwa mpakha ohkhala-mo ninnyaari. Vekeekhai, Owo aari yoowo!

<sup>46</sup> Eyo ekekhaii wira Owo aahivoliwa etala ntoko Mutthu. Okathi Owo okhurunwaawe vamwaako ni khuvoliwa etala, aphavelaka mmvirini ethu wira olye, Owo aari Mutthu. Masi okathi okunx'awe mikatthe iye mithanu n'ihopa vakhani, khwaalyiha atthu ikonto thanu, Owo aahinvikana Mutthu.

<sup>47</sup> Okathi Owo okhwiy'awe iyaakha ekonto emosa ni imiya thanu na xexe sivinre, nihiku na nsuri, othomeiwe-ene vamwiikimanyo, avekelaka omoreliwa ikhari, "Muluku aka, Muluku Aka, mukinyanyalenleni?" Owo aakhwiye ntoko Mutthu. Masi iyaakha ekonto emosa n'imiya thanu na xexe n'itthu sivinre, voosiis'ula, Owo ohooniherya ele Owo aary'awe! Owo oovaha ekanyeryo yookiserya ya omesiya Awe okathi otaphunly'awe malutte a mookhwaani ni omooroni, ni khuhiihimuwa mmahiye, khuxinta, "Miyo ka mukumi voohimala! Ni, okhala wira Miyo ka mukumi, nave-tho nyuwo munnikhla akumi!"

<sup>48</sup> Vo ori Muxintta! Enihimmwa wira yaaniruliwa iventaali ni ottikinyiwa? Atthu aniira wira hiyo n'alolo okhala wira hiyo ninninyakula ni otthimakasa, ni ninninyakula, ni ninnikhuwela. Awo khanatoko woona ittikinyeyelo sa oxintta sa Wirimu, wira, "Ekhotto yoomala!" Muxintta ahu, muulupale ni oowerya oophwanya khula oxintta! Owo omphwanyaneyea meekh'awe, voosiis'ula, oohikwannyiwa!

<sup>49</sup> Okathi Owo oruuuly'awe elapo ya vathi, Owo aavahiwe nsina na vathixa awo yaawenryaaya onvaha Owo, ntoko "namathipelela." Awo yaamwiihanne Owo *Pelizepuli*,

“mukhulupale a axetwani.” Ti yeeyo. Owo aaronwe epooma yootepaxa okhala ya vathi mulaponi, oYeriko, ni mulopwana oyevaxa mpooma aahaana oweha vathi wira amoone Yoowo. Masi okathi Muluku, iyaakha ekonto emosa n’imiya thanu na xexe sivinre, omuhihimunxaawe! Ti yeeyo mutthu omwiirinhaawe Owo. Masi, ni kapwitthi a ophenta, Owo oomuxinta khula xetwani.

<sup>50</sup> Vano Muluku khunvenxeryaxa Owo osulu, khunvaha Nsina vasulu va khula nsina ninromoliwa Wirimu ni vathi. Khula nsina Wirimu ninuuramela Nsina na “Yesu”! Khula Nlaikha, khula mwene, itthu sothene sinnuuramela Nsina na “Yesu”! Khula nlumi ninoomuhimya Yoowo, makutha othene anoomukokhorela Yoowo. Ni Owo oowela osulu saana, mpakha hata Owo orin’awe oweha vathi wira oone Irimu. Owo ti Muxintta oowerya! Owo ti Yoole oirale! Okathi Owo okhumaly’awe elapo ya vathi, nuumala, nsana ohiyu hiyo naahoona, Owo aahikhala sa mookhwaani ni omooroni siryeene epantte Awe, amen, “Muhoove, Miyo ka Yoole aakhwiye, ni onkhala voohimalatho. Ni” (ni etakanxo) “Kookhalana ihulelo sa mookhwaani ni omooroni, sithomeiwe vaava va.” Iwo t’ukhala Muxintta! “Nto, okhala wira Miyo kooxinta, Miyo kipanke paahi ephiro yuulupale wira nyuwo nvire.”

<sup>51</sup> Mutthu aahikhottikeriwa Wirimu, ephiro yuulupale yaahiwaliwa. Khiyaakhanle ephiro yuulupale. Masi, vaavale yahaakhanle ephiro ya osulu, Owo ohoorwa khupaka emosa. Oh, wulu! Eliinya yoopacerya yaari axetwani a ohoverya, yoottharelana yaari ethiru, yoottharelana wiisoona; elapo ela yaakhuneeliwe ni iliinya sa owerya wa xetwani; nuumala ekwerere, iretta. Masi Owo vapacenryaawe owela Wirimu! Nsana ohiyu hiyo noomoona Owo akhumaka omooroni, ni ihulelo sa mookhwaani ni omooroni epantte Awe. Voosiis’ula hiyo nimmuvexa Yoowo. Aleluya! Okathi Owo ohihimuwaly’awe, Owo aahikhala...Owo aari oxintta. Nto, okathi Owo owenlyaawe, Owo oopwanyulasa khula ikuru sa xetwani sinimpuherya mutthu. Owo oowela Wirimu, ni ohaakawela soovaha atthu, soovaha sa Erooho Yoowaarya. Muxintta oowerya! Owo omphwanyaneya meekhaawe, voosis’ula! Ni, eriyari ya Owo ni khula mulipa-oowaamini, eri ephiro yuulupale ya khalayi ni yooreerihiwa ya ereerelo murima yeeyo anaxariya anrowaaya weetta. Khiivo ephiro y’ovuluwa. Eri eliinya emosa paahi okhuma Movuwani. Owo oohiya Maravulo a Ephome okathi Owo eettaly’awe aviraka munvireloni mwa ikuru sa xetwani, khunipakela ephiro yuulupale, okhuma epantte emosa mpakha ekina. Owo okilaanthe Osulu, voosiis’ula, ntoko Muxintta oowerya!

<sup>52</sup> Atthu awe ankhalana yopeeli. Ikonto miloko sene a yaawo, mulaponi mothene, ankhuwela oxintta.

<sup>53</sup> Kinniwehaka etthu ila yooriirya ni yookhaleleya yo wiitakanxa mukereja. Kinniwerya omutthokelela mutthu airaka...Kinoowoonihani okhootteya wa yeeyo.

<sup>54</sup> Va, vamanly'aya Ekhotto Yoopacerya, mutthaka mmosa waamurwa mphironi va, khukela mukarerani wa Greyhound. Awo khwira, "Onyakula iwo wothene exeenii? Sothene iyo mwaha wa xeeni?"

<sup>55</sup> Nto mmosa aya khwira, "Nkawehani va, va eri epaphelo ya ihapari. Ekhotto enoomalaru." Nto atthu othene yinlaka ni ekhuwelaka.

<sup>56</sup> Masi muthiyana mmosa iirale, "Oh, wulu, xeeni yaakhanlyayaaya omalaka siiso?" Khwira, "Vaakhanle wira yaahikhala mahiku vakhani tho," khwira, "John ni miyo naamukhala nihirina mukacamiho wa musurukhu." Khwira, "Khinaarowa okhalana."

<sup>57</sup> Aahikhala mulopwana mmosa eemenle ottuli wookhumani wa karera; khunvara muthiyan'ole, ni aahala omukakha ovira vamukhora. Nto okathi mapiliisa amutthunkwe-aya mulopwan'owo, owo khwira, "Etthu kiirenlyaaaka," owo khwira, "muthiyan'ole khaarina hata mutthu iwe aaryaawe oocaliwa ni yoovo. Masi miyo kookhalana amiravo anli iwe." Owo khwira, "Nkaawerya ovarelela ohakalala waka murima."

<sup>58</sup> Oh, munna! Kookhalana atiithi okhopela iwe. Kookhalana oophentiwa aka okhopela iwe. Eyo yoohimya etthu wa miyo, okathi Yesu oxinttalyaawe. Miyo kookhalana amwaar'aka. Miyo kookhalana mwaana. Miyo kookhalana oophentiwa. Muxintta, muulupale oowerya! Nyuwo pooti okiihana "santu-oophirikeya" wala "namathipelela a etiini," etthu p'itthu enthun'anyu. Masi, kuupuwelaka ekhoto ele yuulupale emalihiwe, ehisapo yoolinvwa, oxintta woophwanyiwa. Yesu ooohimiuwa mw'alipa-ookhwa, ekanyeryo yookiserya y'omesiya Awe, wira sothene soomaliheriwa. Owo mukumii, voosiis'ula, ni ihulelo sa mookhwaani ni omooroni. Kookhalana oophentiwa ari epantte ekina ya mukaano. Miyo kiri ephiro ela yuulupale ya khalayi ya osulu, kiwelaka wira kawoone. Muhuupuwele wira kiroovahuwa. Oh, masi nkireere otteeliwa murima voomalela wira sothene soomalihiwa! Owo muteko woomalihiwa.

Akhalaka, Owo ookiphenta; akhwaaka, Owo ookoopola;

Vavithiw'awe, Owo ooroisha itampi saka ottaiwene;

Ahihimuwaka, owo ookhaliha naxariya mahala voohimala-tho:

Nihiku nlo Owo onimoorwa—Oh, nihiku noovuwa!

<sup>59</sup> Opatiiso ula woottottopeliwa wa khalayi wa Erooho Yoowaarya, wira onihoole osulu ephiro ela y'osulu yooreeraxa,

oh, moota Eyo ery'aya yoovuwa! Moota xeeni kaakhanlyaaka wuuleliwaka muru Yeeyo? Miyo kinikhala ni Paulo Oowaarya, voosiis'ula, kihimyaka ela, "Miyo nkinuuleliwa muru Ehapari yooreera ya Yesu Kristu, maana Eyo Owerya wa Muluku onoopola." Ti Owerya vasulu v'eretta. Ti Owerya vasulu va okhwa. Ti Owerya vasulu va mahiye.

<sup>60</sup> Okathi murummwa ole, oohirukuneya mutokweene aaphiyalyawa we okhomoni wa ephiro awe, khuthimpwa ekhapuri awe iwe, nto okhwa waaninweha wiitho, owo aahitheya owiitho waya. Owo khwira, "Okhwa, mpwino anyu ori vayi? Mahiye, owerya wanyu ori vayi?" Vano owo aahikhuwela mittottopelo sa Muluku, "Masi nimuxukhuruku Muluku Yoowo onnivaha oxintta mwa Pwiy'ahu Yesu Kristu!"

<sup>61</sup> Muxintta ooweryaxa otonko okhala, Muxintta ooweryaxa otonko okhwa, maana Owo aari mmose-ene paahi Owenrye oxintta; okhwa, ni oxintta okhwa ene, ni ohihimuwa ni exinttelo! Owo aahooniherya ele aary'awe. Yaari ekanyeryo yookiserya ya omesiya Awe.

<sup>62</sup> Nto vano, alakela, aakhanleene mutthu mpaani mu voosiis'ula, okhanle mempu a ekereja ookuttihwa, ni ohinsuwela opuha wa ekhotto omalihiwa. Atthu anookhuwela, atthu anoohakalala, atthu animunla! Nyuwo muniira, "Exeeni eniwiira?" Awo annisuvela wira eyo ethu emalihiw. Yothene yoomala! Vekeekhai! Hiyo ninrumiha ikoma. [Munna Branham omanne ikuphi ikuphi—Mol.] Ninrumiha malope, ni Ehapari yooreera enoolaleeriwa. Ovuwa ni Owerya wa Muluku onoosuweliwa. Ni owo muteko woomalihiw, mwiiwanano woolempwa; avuwihiwe Muluku, Kristu oolepa Mphomeni mwAwe Yoowo! Ekhottyo yoomala. Oxintta woophwanyiwa. Miyo nkinatoko oxintta; Owo t'oxinttale! Miyo kintteeliwa murima paahi mwaha wa yeeyo. Wulu!

<sup>63</sup> Okathi amiravo kamosa-kamosa ale atthikaka okhuma ilapo s'okhopela, kooleeliwa wira, okathi paketi ophiyalayaawye oNova Yorke, okathi ophiyalayaawye opatari, awo yaarooweha vale khoona Ethontto ya Otaphuwa. Ti ethu yoopacerya enooneya, ekhumelak. Awo yaahivenya, akina aya atokweene ootuthunya vasulu va paketi, wira ewerye woon. Nto okathi apacenry'aya woon Etthontto ya Otaphuwa, awo khupaceryasa wunla. Awo yaahikhuwelasa. Khiyaawerya osyaka. Axilopwana aalupale a erutthu khukhala vale, axilopwana aalupale a matata oowoma, ethukumelaka ni yeekeseyaka. Awo khayaawerya ovarelala ohakalala waya. Mwaha wa xeeni? Yaari ekanyeryo ya otaphuwa. Ottuli wene wa Etthontto ele ya Otaphuwa, yaaphwanyaneya...yaari apaapa, amaama, oophentiwa, mposi, mwaara, ttuutthu, sothene mulaponi mu saari sooreeraxa wa awo, saari ottuli wa yeeyo. Ni okathi vakhani ehinatthi ophiya, awo yaahisuwelasa, waari muttetthe wa ootaphuwa ni ethhoko y'ale oominyala. Tthiri, eyo yaamuthukumeliha

moonelo aya, epantera ele ya khalayi eveleyaka. Muupuwewe yeeyo, mutokweene ni mirahu sa okhottoni ophiyaka opatari! Vekeekhai, waari okathi wootepe oreera.

<sup>64</sup> Masi, oh, munna, mmosa wa voosiisu uwo, okathi Paketi a khalayi a oSiyoni onoopaaawe epiitu, nto miyo koonaru ekanyeryo ele vale, Mwiikimanyo wa khalayi woowoma! Okathi ettheku enrowaaya emanaka ipantera saya sa khalayi sootweelela, owo eetteettaka ovira mutthapweni wa okhwa. Oxinta xeeni iwo! Vano, khivanxankiha hiyo ohiweryaka ovarelela ethananelo ahu! Yookhala ethu ekhumelenle; hiyo nookhala anammuttetheni. Ethu ene yoomalela.

<sup>65</sup> Okathi otekiwaaya muthato muulupale eriyari ya Onkela epheyo ni—ni—ni Okuusini wa Australiya, okhuma oSidney, mpakha Okuusini wa oSidney. Moota khula mutthu aakunxaawe... Vano, awo yaahirowa elapo yothene, wira ephavele omphwanya mutthu wira opake. Muteko ole khuwaareere wunnuwa, okhala wira awo yaahimya wira khaavo aarowa ovaria. Vookiserya, mulopwana mmosa a oInklatera khwira, “Miyo kinoovara mutek’ovo.” Nto vaphiyalyaawe iwe wira ovare muteko owo, owo aahehererya khula eparafusuus yaaronwe vamuthatoni. Nttittimiho awe ti waatthuneya. Owo aahehererya khula ekokotto ni sothene saarumeeliwe. Owo aaheetta mukwaha, wira aaphwanye ale oosuwelaxa aakhalyaawe waaphwanyak; owo aahaaphwanya mamekaaniku oosuwelaxa, anakimika oosuwelaxa, yoolokaxa, ya sothene aawenryaawe ophwanya. Nto, vookiserya, okathi muthato omalihawaaya, naahiphiya nihiku waariaaya weehererewa.

<sup>66</sup> Alipa-oowuulumela khukhala eweheka paahi, nto awo khwira, “Khenrowa owerya. Enoottikinyeya emore. Khisireere mithaaka vathi vale.”

<sup>67</sup> Masi owo aaroothipa vathi, vathi, vathi saana. Owo aahikhalaana ororomela. Owo aahisuwela wira sothene saahehereriwa. Nto owo khwira, “Miyo kinoolapuwa voopacerya, mmansaka.” Nto okathi waalapuwaawe muthato eetteka, oholo wa mukhulupale a mpooma, ottuli saale; ni akampoyi aalupale, oophiyaka athanu na mosa epantte ni epantte, elapuwaka, ettikinyaka muthato ole. Mulopwana muulupale opanke, eetta oholo wo othataana nno, sa, “Eyo yamora vale, miyo kiri ni yeeyo.” Masi owo aahiroromela.

<sup>68</sup> Ti siiso Pwiy’ahu oottottopeliwa iiralyaawe okathi Owo opanke-awe Ekereja Awe! Owo onneeherererya khula eparafusuus, sothene sinrowa mwa Yeeyo, okhala wira Eyo haana okhala yoorapihiwa ni Ephome! Nto mmosa w’alipa-oowuulumela eemenleene mpararini, aairale, “Nikhuru nle na masantu oophirikeya, awo khanrowa owerya.” Masi nimosa wa mahiku ala oovuwa! Muxintta ola, muulupale oowerya oneetta oholo

wahu olelo, exinttelo! Ehiwe eyo ettikinyeye, yiire entthunaaya, Owo ono... Khonrowa okhala hata othereneya mwa yeeyo, hata nipuro, maana Owo oopaka ephiro, ni oomaleliha. Vekeekhai!

<sup>69</sup> Hiyo ninuupuwela olelo mwa moolomo a atthu, ninkhalihia muupuwelo ahu mwa ithu sa molumwenkuni. Masi mukihiyi kooleeleni etthu emosa, munna, kihikhalkhale kuuliwaka muru mwaha wa Ehapari yooreera! Oh, munna, miyo ka a enamuna ya khalayi paahi, ooyariwa vasya, ooyariwa a Erooho Yoowaarya, a Erooho ya Muluku. Miyo kiyariwe siiso, eyo ti yothene ekhanly'aka, ni kweekwe kintthunaaka okhala.

<sup>70</sup> Emaara emosa, woohikhala khalayi, aahikhala mwaaruusi mmosa aaronwe okoleexiyu. Ni owo aari mwaaruusi, oophenteya. Nto okathi ohokolowenlyaawe owaani, owo aahiruuha akhili awe a okoleexiyu ni yoowo.

<sup>71</sup> Nto khino, voosiisu ula, akina wa nyuwo mwaahikhala akhili anyu a ota ni nyuwo. Khino nyuwo mooruuhu, okereja, akhili anyu anci-ene. Ahe, mwiihuluxe, ti ethu yooreera miyo ensuwel'aka wira.

<sup>72</sup> Nto mwaaruusi ula, okathi kampoyi eemenle-awe ohoolo, owo aahimurwaana mwaaruusi mmosa ni yoowo, mmosa wa ale oohilakeya, nyuwo moosuwela, ntoko muthinto wa Elvis Presley. Nto okathi waaryaaawe vale, moosuwela, vakampoyini, ame awe yaari, vate, muthiyana mmosa oowuuluvala eemenle vale, othene aarina mirahu, wiitho wawe; makhata makhaani, ookhurupuwa; ni owanre-ene evistiitu ya malepa a havara, ekuwo yaamukhaani ya muxikoni mmakhatani mwawe. Nto oohilakeya ola mwaamukhaani aari ni yoowo, mwaarusi ula mukina, khuweha vathi, khwira, "Ahe, namuhaawi ule, oonanara ootakhaliwa t'ani?"

<sup>73</sup> Ahe, moosuwela, eyo yaahimuulihia muru mwaaruusi ule vanci-ene, owo khwira, "Nkisuwenle," okhala wira owo aari oowiihimyaxa, ni aahikhala akhili anci-ene a molumwenkuni mmuruni mw'awe. Ni yaari amey'awe ene.

<sup>74</sup> Vakhurunwaawe mukampoyini, mai mwaamukhaani khutthimaka, wira ampatikhe. Owo khwira, "Oh, oophentiwa, Muluku areerihe murim'anyu mwaamukhaani." Nto owo khimurukunuwela ettuli khupacerya ohuluwa, ntoko wira khaamusuwela. Owo aarimuuliwa muru, okhala wira ame awe yaari oonanaraxa.

<sup>75</sup> Nto khwiiraneya, wira xoofeeri mukampoyini mmwe, aanimusuwela wahala ene. Owo khurowa mpakha vale, khumpweherya matata vanikhatani mwaaruusi ule, khimurukunxela ohoolo wa muthukuman'ole, khwira, "Wuuliha muru! Wuuliha muru!" Khwira, "Kihoona okathi ame anyu yaary'aya imaara muloko ooreera woovikanani nyuwo." Khwira, "Awo yaari... Miyo kaakhala vakhiviru." Nto khwira, "Nyuko mwaari mwanamwane mwaamukhaani,

vano nyuwo mwaari epantte y'osulu vooilini vanyu wa mwaana. Nto ame anyu yaaneya ikuwo ottuli okintaali." Ni khwira, "Naanaanoru, ttukuttha khupatta mooro, ni empa yothene khupatta. Nto ame anyu vatthimakalyaaya erowaka, ni khusuwela wira nyuwo mwaari epantte y'osulu, iwe." Khwira, "Khukhuweliwa, khweererya waavara. Masi awo khurihela, yaarinaaya, khutthimaka eviraka vamooroni vale, erowaka epantte y'osulu; ni khukumiha ikuwo veerutthuni vaya, khooputaputelani nyuwo. Vano awo khurwa va, ethikaka eriyari ya mooro, yookunxeni nyuwo. Nto awo khuhileya, vapuwani, ni nyuwo mmoononi mwaya." Ni khwira, "Awo yaakunxe ethu yaarowa waakhapelela, khookhapelelani nyuwo." Nto khwira, "Etthu mukhalenlyaanyu ooreera olelo, mwaha wa yeeyo awo akhanlyaaaya oonanara. Nto, nyuwo munthuna okileela wira, nyuwo mwaamuuliwa muru mwaha wa mirahu iye mwa ame anyu?"

Kinnuupuwela olelo:

Yesu aatthepaka mwiikimanyo meekhaawe,  
Nto olumwenku wothene onakhala  
wootaphuwa?  
Wookhala mwiikimanyo wa atthu othene,  
Ni wookhala mwikimanyo wa miyo.

<sup>76</sup> Vakhala wira Yesu aatthokeleliwe okhala "Pelizepuli," ni olumwenku ula, Owo aahitheiwu n'unyemuliwa, ni othomeiwa vamwiikimanyo, khukhalihwa ehaaya mwaha wa miyo, kinnitteeliwaxa murima ovilela oveehiwa wa owaarya Wawe. Ayo, mulopwana. Wihaniwa, "Santu oophirikeya!" ethu p'itthu enthun'anyu wiihana, khula yoohimya enthun'anyu wiihana. Eyo khenikhooftiha hata vakhani. Miyo kooteeliwa murima, voosiis'ula, wira, mmurimani mwaka, Kristu ohihimunwe onnikhala ni onnilamulela. Miyo ka mmosa w'atthu Awe. Miyo kinniroromela wira mwa yeeyo, nave.

<sup>77</sup> Okathi ahu woomala vano. Vekeekhai ewoora yaneethanu neili, okathi ohimmy'ahu wira naamulaiha. Miteko mikina s'okokhorela sinrowa opacerya iwoora soophiyaka piili, vano, ewoora yaneethanu na xexe ni minuutu miloko miraru.

Nrowe nuurame muru, okathi vakhani paahi, nivekelaka.

<sup>78</sup> Tithi oottottopeliwa a Wirimu, minuutu miloko mixexe ni mithanu soovira, Masu aalaleiwa. Mirima sahu ti sootteeliwa. Yopeeli onimwiiraneya; kahi yopeeli paahi a nihiku nimosa, masi yopeeli a Ehimalelo! Movuwani, Malaikha animwiipa. O Muluku, Ekereja, vooxintta, enimwiipa. Ittiwi sa ohakalala sinooruma. Minepa saatonko olamuleliwa okhwa, ni wira sikhwe ni sirowe mmahiye mwa xetwani, xetwani ooxinttiwa! Okhwa wooxinttiwa. Mahiye aaxinttiwa. Eretta yooxinttiwa. Mwiikho wooxinttiwa. Etakhalelo yooxinttiwa. Onyokhana wooxinttiwa. Ohicaliwa wooxinttiwa. Okhaleleya wooxinttiwa. Iyaanyiheryo

sooxinttiwa. Itthu sothene sooxinttiwa. Kristu ti Muxintta mulupale!

Moone! Nkanweheni Muxintta Oowerya,  
 (ohimmye ti namalepa)  
 Mmoone! Nkanweheni Owo owoooneya oratt-  
 ene,  
 Maana Owo ti Muxintta Oowerya,  
 Okhuma okathi Owo okhenryaawe ekuwo  
 ipantte piili.

<sup>79</sup> Owo ookhera ekuwo ele yaamwiipithiherya mutthu Muluku, nto vano Muluku onkhala eriyari y'atthu. Owo ookhera ekuwo ele yaakhottiha ovoniha wa Muluku. Owo ookhera ekuwo ele yaakhottiha eparakha ya Muluku. Owo ookhera ekuwo ele yaakhottiha otthapa wa Muluku. Owo ookhera ekuwo ele yaakhottiha murettele wa Muluku. Vano ekuwo yookheriwa ipantte piili. Ni Ephome Awe Yoowo, Owo oheetta ntoko Muxintta! Ekhotto yoomala, Owo ooonooniherya moohihimuwani Mwawe. Nto vano Erooho Yoowaarya ti namoona, eveleelihwiwira enihooleke.

<sup>80</sup> O Muluku Ohinimala, akhala mutthu va voosiis'ula, ompisaka, okelaka ni okhumaka, ephiro yuulupale, omorelaka okerekhere wa ephiro, ohinatoko owerya weetta eriyari, ni anamwiivaha aalupale, oowiivaha aalupale yeettale eriyari ya ephiro yuulupale, hiyo ninvekela, voosiis'ula, wira awo evahererye sothene wa Nyuwo, ni ekhume epuhe oxintta nno wuulupale ophwanyiwe ni Pwiy'ahu ohihimunwe. Munivahe, Tithi, vano hiyo ninvekela mwa Nsina na Kristu.

<sup>81</sup> Nto nirineene muru ahu woowuurama. Kaatthuna kisuwele, okathi ula, vakhala wira mwaamutthuna onvenxerya matata anyu Kristu, ni wira, "Kristu, kinnixukhurela, nkinkhalakhala kuuliwaka-tho muru mwaha wa Nyuwo. Kinnikhalaka oolosowa vakhani." Muluku ooreeriheni, muhano. Muluku ooreeriheni, mulopwana. Muluku ooreeriheni, nyuwo. Oh, wulu, matata anoovenxiwa mapuro othene! "Miyo kinnikhalaka oolosowa vakhani. Kinnikhalaka ntoko oowuuliwa muru. Ni vekeekhai kinnoona mukhalelo aka vano. Nkaakanle nnakhala wira kiiraleene yeeyo. Kaahaana ovenya, ohimya onamoon'aka! Kaahaana okhala yeeyo tu. Kaahaana waahimeerya atthu othene, 'Miyo kooyariwa vasya.' Kaahaana waahimeerya atthu othene, 'Kihaakhela Erooho Yoowaarya.' Miyo nkinuuleliwa muru Ehapari yooreera, okhala wira Eyo ti Owerya wa Muluku onoopola. Miyo kinthuna kikhale muKristu oowiilipiha vekeekhai. Miyo nkinikhalaka. Masi, ni mukhaliheryo wa Muluku, okhuma voosiis'ula wa Paasikha, kinookhala. Kinookhala." Mutthu mukina-tho onivenxa matata vano nihinatthi ovekela? Muluku ooreeriheni, nyuwo, nyuwo, nyuwo.

<sup>82</sup> Wulu, nkawehani ithanlelo! Miloko miili ni thanu mano wala miloko miraru, kikilanthe-ene eriyari ya nikhuru nla naamukhaani n'atthu voosiis'ula, ahiira ethanlelo. Okhuma voosiis'ula wuulupale wa exinttelo, awo anoorowa, ni mahala a Muluku, wiihiyaniha ni ohuuliwa muru mwaha wa Ehapari yooreera, maana Eyo Owerya wa Muluku onoopola.

<sup>83</sup> O Muluku, ni matata ala avenxiwe, ni nsipo ninooruma-tho voomaaleleya nirowaka mphironi, wira noovira mookhwaami khuphwanya Ekumi, maana Nyuwo moohimya wira, "Ole oniiwa Masu Aka, ni onimwaamini Ole okirumme, ookhalana Ekumi ehinimala." Awo aavira mookhwaani khuphwanya Ekumi, okhala wira Nyuwo mwaahikhala okhwa wira awo ewerye okhala Ekumi, mwa ohihimuwa Wanyu. Nyuwo mwaahikhalihiwa oyeva ovikana Malaikha, khukhuruwa wira mukhale mutthu, mwaakhumme muTeyofaniiyani ile yuulupale Iwe, mwaapanke erutthu ni khukhalana Ephome, khumwaraxa Ephome eyo, wira nwerye onipakela ephiro yo ovuluwa hiyo othene. Vano kahi murimwiira paahi, (hiyo noosoma mBibilian), masi Nyuwo muhooniherya, voohivonyeya, mwaha wo ohihimuwa mw'alipa-ookhwa, ni waahihimuxa alipa-ookhwa okathi Nyuwo waaryaanyu muumu elapo ya vathi; kahi yeeyo paahi, masi Nyuwo munniyaha, Nyuwo mookhaliha eyo iyooniheryo piili, ntoko Nyuwo saamwiirenlyanyu Abrahamu; vano, ohiya vo, Nyuwo mooveleeliha Erooho Yoowaarya ntoko namoona. Ni hiyo nookhalana Mukhalelo Aya wooreeriha ni hiyo, ni mwa hiyo, enihoolaka, eneettiheruya mw'Ekeekhai yothenne ni Waarya.

<sup>84</sup> Hiyo ninnooxukhuruni Nyuwo mwaha wa matata ala manciene avenxiwe, voosiis'ula, yiiraka, "Miyo vano kinnimukuxa Kristu ntoko awaka." O Muluku, vakhala wira awo khanatoko opatisiwa mmaasini, wira ethoonyerye okhwa wuulupale, ovithiwa, ni ohihimuwa w'Apwiya aya oottottopeliwa, awo etthikele vamutekoni w'okokhorela voosiis'ula, eruuhaka ikuwo saya, ni oolikana wira ekhuruwele etanki ila yooriirya. Munivahé, Tithi.

<sup>85</sup> Munireerihe. Munilevelele itampi sahu. Hiyo nnimoovahani ntottopelo moovirani w'okathi onirwa. Ekhotto yamala vale, okathi mwiixi onrowaaya omwaramwareya wothene, nto otthapa wothene omalamane, wa iyano iya sa vathi, vaavo hiyo onoovuwihaahuni Nyuwo ni itthu sothene hiyo nrinaahu, nihaana orowa okhalana masu masya, ookhala asya, wira noovuwiheni Nyuwo ni seiyo. Niwerye ovolowa nto ni ohakalala. Vano hiyo ninvekela mwa Nsina na Kristu. Amen!

<sup>86</sup> Nrowe nivenye neemele vano...?...Muhiliyale miteko, ewoora ya neethanu na xexe ni minuutu miloko miraru. Rowakan owaani, mwalye yoolya anyu ya voosiisu. Mutthike, ninwehererya okhala ni nyuwo naanaano. Vano nto ohiy'ula,

muupuwele. Kihaana okhuma oxekuw'ola, kisomaka ni kivekelaka.

<sup>87</sup> Maana Miyo kinoolelani, wira, Kristu mukumii, Owo khokhwie. Ni kinnaamini, ni murim'aka wothene, Owo onookhala mpaani muumu ohiy'ula, wira ooniherye wira Owo mukumi, wira aire itthu imosaru seijo Owo iiraly'awe voosiisu ule wa Paasikha ni muhina mwa evirelo ya Ekumi Awe. Yaahikhale siiso, weeso miyo ka profeta owootha. Kinnitthapa osuwela wira okathi ula muulupale w'epiphi hiyo onkhalaahu vano, okathi nroromelo wothene, onkhalaaya ntoko, woomala; Kristu, Mwala woolipa hiyo onweryaaahu olipa-vo, itthaya sothene sikina mithaaka sinkomowa. Vaareera.

<sup>88</sup> Esipo ahu yaamukhaani, y'olaxeryana, ya *Mukuxe Nsina Na Yesu Ni Nyuwo*. Atthu othene, vamosa vano.

Mukuxe Nsina na Yesu ni nyuwo,  
Anamwane a mixankiho ni ooriipiwa murima;  
Nlo nnimoovahani otthapa ni . . .

<sup>89</sup> Murukunuwe, nvahane matata, mmwiirele, "Attottopeliwe Apwiya," mutthu ori vakhiviru ni nyuwo. (Ahe, attottopeliwe Apwiya . . .? . .)

Muroromelo wa mulaponi ni ohakalala wa  
Wirimu;  
Nsina Nooreerexa, O moota ninsivel'aya!  
Muroromelo wa mulaponi ni ohakalala wa  
Wirimu.

<sup>90</sup> Vano atthu othene anweha epatt'ilan no? Nrowe nimuttottopele Yoowo paahi. Nrowe nivenxe matata paahi, niire, "Kooxukhuru, Pwiya, mwaha wo woopola munep'aka." Vaareera, atthu othene!

Kooxukhuru, Pwiya, mwaha wo woopola  
munep'aka,  
Kooxukhuru, Pwiya, mwaha wo okikhaliha  
mukumi;  
Kooxukhuru, Pwiya, mwaha wo okivaha,  
Woopola Wanyu wuulupale woomalela ni wa  
mahala.

<sup>91</sup> Etthu xeeni yooreerihwa! Nyuwo munnimphenta Owo? Mwiire, "Amen." Oh, e . . . Sothene soomalelihiwa vano, aana. Sothene soomala, khokhanle-tho hata owana, khekhanle-tho ekhotto, hat'etthu murin'anyu wira; yoomala wiiriwa. Hiyo ninootthapa paahi! Oh, wulu! Hiyo nri oomalela, mwa Yoowo!

. . . kimumulaka,  
Owooopowa ni oolipa wa ovela-vela wothene;  
Kimumulaka, kimumulaka,  
Kimumulaka mmoononi wa ohimala.

Oh, mooma onsvaaya weetta mmukwahani mu,  
 Kimumulaka mmoononi wa ohimala;  
 Oh, ephiro xeeni yoowaarya enkhala nihiku ti  
 nihiku,

Kimumulaka mmoononi wa ohimala.

Kimumulaka, kimumulaka,  
 Owoopowa ni oolipa wa ovela-vela wothene;  
 Kimumulaka, kimumulaka,  
 Kimumulaka mmoononi wa ohimala.

Nyuwo munwerya, ni murina nleeso, mukuxe.

. . . oh, kimumulaka,  
 Owoopowa ni oolipa wa ovela-vela wothene;  
 Kimumulaka, kimumulaka,  
 Kimumulaka mmoononi wa ohimala.

Vano Bibilia anyu!

Kimumulaka, kimumulaka,  
 Owoopowa ni oolipa wa ovela-vela wothene;  
 Kimumulaka, kimumulaka,  
 Kimumulaka mmoononi wa ohimala.

<sup>92</sup> Exeeni iyo? Owoopowa ni oolipa, sothene soomala,  
 sothene soomalihwa, ekhotto yoomala, ekanyeryo yookiserya  
 yootaphuliwa, Owo oowela. Aleuya!

Kimumulaka, kimumulaka,  
 Owoopowa ni oolipa mmoononi wa ohimala;  
 Kimumulaka, kimumulaka,  
 Kimumulaka mmoononi wa ohimala.

<sup>93</sup> Vano nrowe nuuramelihe muru vatthayani vaavo Muluku  
 onikuminhaawe-vo, vaavo nihiku nlo onrowaahu owela  
 nikhumaka vatthayani va elapo ya vathi. Maana, Pwiy'ahu,  
 ookumihiwa vatthayani, khurowa mutthayani, wira anivah  
 Erooho Awe ehinikhwa, Owo oowela okhuma vatthayani, ni  
 othene ale ari mwa Yoowo, anoowela ni Yoowo nihiku nlo,  
 mapuro a ale ooreerihwa.

<sup>94</sup> Nuuramme-ene muru, kinnimoona Munna Smith ori eriyari  
 ahu, voosiis'ula, pastore a Ekereja ya Muluku; aahikilikarela  
 nsana ohiyu. Munna Smith, xontte murwe. Kaatthuna kisuwele  
 vano, vakhala wira Munna Smith onoonilaiha ni nuulumo na  
 mavekelo. Mwaakuvele mmawannyinyu, mwalye yoolya anyu ya  
 voosiisu. Mutthike mwaha wa muteko w'okokhorela wa Exikola  
 ya Ttiminku, ni muteko w'opatiiso, naanaanoru onipacerya  
 iwoora thanu na xexe ni minuutu miloko miraru. Nuurame muru  
 okathi Munna Smith onnilaihaawe ni mavekelo.



*MUXINTTA MUULUPALE Ni OOWERYA* EMK57-0421s  
(The Great And Mighty Conqueror)  
ETTHARANELO MIHAKALALIHO SA PAASIKHA

Mutthak'ola wa Munna William Marrion Branham, opaceryawene olaleeriwe ni Enkelesi Ettiminku ya paasikha vaasiisu nsuwa niphattuwaka, mahiku yeettaka 21 mweeri wa Abril, 1957, oBranham Tabernacle oJeffersonville, Indiana, wAmerika, okuxiwe wo okaravariwa mufitani ya makineti khulempwa wothene ni nttaava n'Enkelesi. Otaphuleliwa nno mw'Emakhuwani okhumiheriwe ni okaiwe ni Voice Of God Recordings.

EMAKHUWA

©2023 VGR, ALL RIGHTS RESERVED

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Olopola mwaha wa ihaakhi sa mwaneene

Ihaakhi sothene sinnaakiheriwa. Eliivuru ila pooti otthittiwa owaani wira mutthu arumeele wala okaiwa, voohilinvwa etthu, ntoko ekaruma y'olaleerya Ehapari yooreera ya Yesu Kristu. Eliivuru ila ehitumihiweke, otthittiwa eyaattelo yuulupale, oheliwa muwepisaiti, oheliwa moothukumanyiwa wira ekuxiwe-tho, otaphuleliwa ni mattaava makina, wala orumeeliwa wira ophwanyiwe musurukhu vahikhanle n'utthuniheriwa woolempwa ni Voice Of God Recordings®.

Mwaaphavelaka wiiwa-tho wala ikaruma sikina sikhanle, xontte mulavule ni:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)